

吳興備志

四

蘇子卿
船齋
PDG

吳興備志卷之九

烏程董斯張遐周策編

人物徵第五之二

沈曇慶懷文從父兄也父發員外散騎侍郎曇慶仕宋位尚書左丞時歲有水旱曇慶議立常平倉以救人急文帝納其言而事不行大明元年爲徐州刺史時殿中員外將軍裴景仁助成彭城景仁本北人多悉關中事曇慶使撰秦記十卷叙苻氏事其書傳于世曇慶謹實清正所莅有稱績常謂子弟曰吾處世無才能圖作大老子耳世以長者稱之終祠部尚書

南齊書

沈文季字仲達文叔弟也以寬雅正直見知尤善博及

彈棊在宋封山陽縣五等伯位中書郎父慶之遇害諸子見收文叔謂之曰我能死爾能報遂自殺文季揮刀馳馬去收者不敢追遂免明帝立爲黃門郎沈攸之起義齊高帝加文季冠軍將軍督吳興錢塘軍事改封西豐縣侯文季風采稜岸善于進止歷尙書右僕射王晏嘗戲文季爲吳興僕射文季荅曰瑯琊執法似恆出卿門建武二年魏軍南伐明帝以爲憂制文季鎮壽春文季入城嚴加備守魏軍尋退百姓無所損後東昏屢行殺戮尙書令徐孝嗣深懷憂慮欲與文季論時事文季輒引以他辭終不得及文季以時方昏亂託老疾不豫朝機兄子昭略謂文季曰阿父年六十爲員外僕射欲

求免乎文季笑而不答未幾見害先被召便知敗舉動如常登車顧曰此行恐往而不反於華林省死朝野冤之中興元年贈司空謚曰忠憲公

世祖在東宮於玄圃宴會朝臣文季數舉酒勸褚淵淵甚不平啟世祖曰沈文季謂淵經爲其郡數加淵酒文季曰惟桑與梓必恭敬止豈如明府亡國失土不識枌榆遂言及虜動淵曰陳顯達沈文季當今將略足委以邊事文季諱稱將門因是發怒啟世祖曰褚淵自謂是忠臣未知身死之日何面目見宋明帝世祖笑曰沈率醉也中丞劉休舉其事見原後豫章王北宅後堂集會文季與淵竝善琵琶酒闌淵取樂

器爲明君曲文季便下席大唱曰沈文季不能作妓兒

沈道虔居縣北石山下精廬與諸兄子共釜庾而資困不改節家世事佛推父祖舊宅爲寺至四月八日每請像請僧之日輒舉家感慟焉道虔年老菜食琴書爲樂孜孜不倦文帝敕郡縣使隨時資給子慧鋒脩父業不仕

武康沈儼之字士恭徐州刺史曇慶子亦不仕永明元年徵中書郎

沈麟士父虔之宋樂安令麟士幼而俊敏年七歲聽叔父岳言玄賓散言無所遺失岳撫其背曰若斯文不絕

其在爾乎及長有高尙之心作玄散賦太守孔山士辟不應宗人徐州刺史曇慶侍中懷文左率勃來候之未嘗答也會稽孔源休輩皆從學焉年過八十耳目猶聰明家故被火災乃手鈔故所燬亡書成二三千卷滿數十篋人以爲養身靜默之所致也卒年八十五遺令祭奠惟清水一杯子孫奉而行之

竝上

宋陸琳吳興東遷人九徵不起謚高道處士卽簡寂先生之父也

茅山志

沈總齊尙書祠部郎

沈不害祖陳書

正系祕書監

靈鞠祖南齊書潘綜傳作繼祖

沈曠太子詹事

見陸澄傳南齊書

沈坦之齊都官郎

顗父梁書

沈憲字彥璋演之從祖弟子也憲少有幹局爲駕部郎宋明帝與憲棊謂曰卿廣州刺史材也補烏程令甚著政績太守褚彥回歎美以爲方圓可施以吏能累遷少府卿武陵王暕爲會稽以憲爲左軍司馬帶山陰令政聲大著孔稚珪請假東歸謂人曰沈令料事特有天才

南齊書

沈沖字景綽懷文子也懷文得罪被繫沖兄弟行謝情哀貌苦見者傷之入齊屢遷御史中丞五兵尙書沖與兄淡淵名譽有優劣世號爲腰鼓兄弟淡淵竝歷御史中丞兄弟三人皆爲司直晉宋未有也永明中淵彈吳

興太守袁彖建武中彖從弟昂爲中丞到官數日奏彈
淵子續父在饒白幘車免官禁錮沖母孔氏在東鄰家
失火疑爲人所焚熱大呼曰我三兒皆爲御史中丞與
人豈有善者方恐肌分骨散何但焚如兄弟後竝歷侍
中武帝方欲任沖尋卒追贈太常諡曰恭子

王靈鞠烏程人父道眞護軍長史累遷員外郎後爲烏
程令不得志泰始初坐事禁錮數年褚淵爲吳興太守
謂人曰此郡才士惟有王靈鞠及沈勃耳乃啟申之武
帝卽位尋領東觀祭酒靈鞠曰人居官願數遷使吾終
身爲祭酒不恨也靈鞠好飲酒臧否人物在沈淵坐見
王儉詩淵曰王令文章大進靈鞠曰何如我未進時

竝

上

齊竟陵王子良開西邸招文學王僧孺與太學生並國賓並令楷輩並以善詞藻游焉國賓吳興人以才志不遇著書以譏楊雄令楷亦吳興人

南史

太學生會稽魏準以才學爲王融所賞融欲奉竟陵王子良準鼓成其事虞羲並國賓竊相謂曰竟陵才弱王中書無斷敗在眼中矣後如其言

王融傳

吳興並仲起字子震爲晉平郡清廉自立褚淵歎曰見可欲心不亂此楊公所以遺子孫也元徽中官至廷尉並上

吳興沈徽孚以士流通事舍人而已無權利徽孚麤有

筆札建武中文詔多其辭也官至黃門郎

南齊書

始安王遙光勸上併誅高武子孫于是竝敕竟陵王
昭胄等六十餘人入永福省令太醫煮椒二斛謂舍
人沈徽孚曰椒熟則一時賜死期三更當殺之會上
慙臥主書單景雋啟依旨斃之徽孚堅執曰事須更
審爾夕三更子恪徒跣奔至建陽門上聞驚覺曰故
當未賜諸侯命邪徽孚以咎上撫牀曰遙光幾誤人
事及見子恪顧問流涕諸侯悉賜供饌

蕭子恪傳

齊王該吳興人澄心內典嘗著日燭數千言文綺理晰
學佛者賞之

弘明集詳藝文

張迪吳興人南齊時太常少卿

談志德清縣寺院下

褚惠開字智遠吳興武康人也每以戒行自脩拯濟爲務齊大明八年天下飢饉慧開有少穀實乃振鄉邑賴之有三人積飢食飽而致死其家訴縣稱惠開飼殺餓人苦相誣謗邑令笑曰乞食飽死反怨主人法無此科遣而不問

太平經

沈瑀字伯瑜武康人父昶事宋建平王景素景素謀反昶先去之及敗坐繫獄瑀詣臺陳請得免罪由是知名爲奉朝請初瑀在竟陵王家素與范雲善齊末嘗就雲宿夢坐屋梁柱上仰見天中有字曰范氏宅至是瑀謂帝說之帝曰雲得不死此夢可驗及帝卽位雲深薦瑀自旣陽令擢兼尙書右丞瑀薦族人沈僧隆僧照竝有

吏幹帝竝納之歷尋陽太守爲信威蕭穎達長史瑀性
屈強每忤穎達穎達銜之天監八年因入諮事辭又激
厲穎達作色曰朝廷用君作事行耶瑀出謂人曰吾死
而後已終不能側傾面從是日于路爲人所殺多以爲
穎達害焉子續累訟之遇穎達尋卒事不窮究續乃布
衣蔬食終其身

梁書

沈瑀爲建德令教民一丁種桑十五株柿四株及梨
栗女丁半之頃之成林矣

合璧事類

沈瑀爲揚州部從事時建康令沈徽孚恃勢傲瑀瑀
以法繩之眾憚其強

沈瑀傳

齊建武中吳興人姚方興采馬王之義以造孔傳舜典

云於大航購得詣闕以獻舉朝集議咸以爲非及江陵
版蕩其文入北中原學者得而異之隋學士劉炫遂取
此一篇列諸本第故今人所習尙書舜典元出于姚氏
者焉

史通

張緒領揚州中正長沙王晃屬選用吳人聞人邕爲州
議曹緒以資藉不當執不許晃遣書佐固請之緒正色
謂晃使曰此是身家州鄉殿下何得見逼

南齊書

南史以吳興爲吳郡豈以緒爲吳郡吳人耶

沈約字休文性不飲酒雖遇隆重而居處儉素立宅東
田矚望郊阜嘗爲郊居賦以序其事左曰重瞳子腰有
紫痣聰明過人好墳籍聚書至二萬卷京師莫比少時

孤貧丐於宗黨得米數百斛爲宗人所侮覆米而去及
貴不以爲憾

並上

沈隱侯曰文章當從三易易見事一也易識字二也
易誦三也邢子才嘗曰沈侯文章用事不使人覺若
胸臆語也深以此服之祖孝徵亦嘗謂我曰沈詩云
崖傾護石髓此豈似用事耶邢子才魏收俱有重名
時俗準的以爲師匠邢賞服沈約而輕任昉魏愛慕
任昉而毀沈約每以談讌辭色以之鄴下紛紛各有
朋黨祖孝徵嘗謂我曰任沈之是非乃邢魏之優劣
也

顏氏家訓

觀休文眾製五言最優詳其文體察其餘論固知憲

章鮑明遠也所以不閑于經綸而長于清怨于時謝
眺未遒江淹才盡范雲名級故微約稱獨步雖文不
至其工麗亦一時之選也嶸謂所著既多今翦除浮
雜收其精要允爲中品之第矣故當詞密于范意淺
于江也

鍾嶸詩品

沈約之作如閨闔疏鐘建章清漏不棘不舒有節有
度且遲之作如琪樹玲瓏金芝布濩九霄春露三島

秋雲

竹林詩評

裴子野祖松之宋元嘉中受詔續脩何承天宋史未
成而卒子野常欲繼承先業及齊永明末沈約所撰
宋書稱松之已後無聞焉子野更撰爲宋略二十篇

云戮淮南太守沈璞以其不從義師故也約懼徒跣
謝之請兩釋焉約削宋書子野亦削宋略

南史參陽

休玠八代談藪

沈顗字處黔齊永明年中徵拜著作郎太子舍人通直
郎竝不起梁天監四年大舉北侵南陽樂藏爲武康令
以顗從役到建鄴揚州別駕陸任以書與吳興太守柳
惲責之不能甄善別賢惲大慙卽表停之所著文章數
十篇

沈峻字士暘武康人家世農夫至峻好學與舅太史叔
明師事宗人沈麟士在門下積年晝夜自課睡則以杖
自擊其篤志如此遂博通五經尤長三禮爲國子助教

兼五經博士於館講授聽者常數百人及中書舍人賀琛奉敕撰梁官乃啟峻補西省學士助撰錄書成入兼中書通事舍人出爲武康令

孔子雲山陰人師事吳興沈峻峻始爲國子助教吏部郎陸倕言于僕射徐勉以爲周官一書羣經源本學絕不傳已歷年世惟峻獨精宜卽用其人使專此學勉于是奏峻兼五經博士于館講授子雲實傳峻業官亦至五經博士焉

梁書

王暹字希範靈鞠子八歲便屬文靈鞠嘗謂氣骨似我梁武帝平建鄴引爲驃騎主簿甚被禮遇時勸進梁王及殊禮皆暹文也及踐祚遷中書郎待詔文德殿時帝